

YONI 'INA 'ETOLADI 'ELUWENA

**Yoni 'ina leta gete solanaya
'iemwasala oboboma be
e'ita palupaluna manudi.**

Lokagutoki

¹Abo'agu 'imi 'ena'i, ta 'oyo waine Yaubada 'iesinuwemu manatumwao 'emiya leta gete ya'etoladinawa. Ona'ai'aila, yaobobomemi sinabwana. Nadigega wate taudi 'eda 'ai'aila 'ana tomuliyao siobobomemi, ²manuna mwalatoi 'ai'aila 'atedaya 'imiyami be 'edaya 'ida miyaataya. ³'Enega Tamada Yaubada be Natunana Yesu Keliso 'idi oboboma be 'idi 'atenuwa'ole'ole 'ediyega tada miya siwalowa, ma ida ona 'ai'aila, be wate ma ida eobooboboma.

Keliso tetelina wagiya'i'isi

⁴Lowa 'aidi natumwao ya'itedi 'eda palupaluna simulimuliye, nadigega 'ada lolina Tamada 'enega, 'enega yagwawsowala sinabwana.

⁵Nuugu ye, yasideyo wate gete nigeya 'aene lolina auwauna ya'ebwa'ebwa'eyo, ta esi lolina kadekadelina nina wagimi nononaya 'aene maibo'ada tada eobooboboma. ⁶Manuna 'eguma taeobooboboma, nate Yaubada 'ina lolinao tamulimuliyedi, ta lolina nina lowa wanononaya 'aene oboboma 'ina 'eda 'enega tada tauya.

⁷Ta tokabo yaudi ni'atu siapwesa bale'uya ga sieyaseyase, sigwae, "Yesu Keliso nigeya 'ieetomota." 'Eguma yaita nadigega 'ikabo'esa, tauna Keliso 'ana talauwala. ⁸'Enega tokabo nidi 'ediyega wada 'ita'i'isimi, be 'imi guinuwa 'ana pali geya'abo waloseloseye, ta esi maibo'ana wa'ewa.

⁹Ta 'eguma watauya gesi be Keliso 'ina e'ita wapilisine, 'omi Yaubada

wamiyamiya sine, ta esi 'eguma Keliso 'ina e'itao wagiya 'i'isidi,
Tamadai be wate Natunana 'emiya simiyami.

¹⁰ ^a 'Enega 'eguma yaita 'emiya 'iwawai ta 'ina e'ita dumadumana,
geya'abo wabwaubwaue 'imi anuwaya nai walokagutokiye, ¹¹ ^b 'abona nai
'ina guinuwa nina to'umalina walemeleme.

Ona 'ana 'ebe losalowa

¹² Yage yauna simiyami be nuwanuwagu manudi ya'etoladiwa, ta tuwa,
manuna yanuwayaina 'aene ma'etamo yada wai be 'omi ma'egwao tada
'awagwae, be 'enega tada egwausowala 'ai'aila.

¹³ Tasiyo tauna wate esiesinuwana Yaubada 'enega, natunao 'idi
oboboma 'emuya.

^a 1:10 Md 10:13-14; Lo 16:17 ^b 1:11 1 Ti 5:22